

Fugitivs en Svizra

Novitads da Soluturn a Losanna

DA GUIJU SOBIELA-CAANITZ

■ **Ils 18 d'october elegia il suveran svizzer las duatschient persunas che duain far part dal cussegl nazional. Ins resguarda ils svilups demografics dals davos onns: L'Argovia, Turitg ed il Vallais gudognan mintgamai in mandat, entant che Berna, Neuchâtel e Soluturn perdan mintgamai in. Il center da la Romandia sa spusta pia encunter sidost, quel da la Svizra alemana encunter nordost.** Ins spetga plain mirveglia quai che vegn ord las urnas. Tge quitads influenzeschan l'electorat en tge chantuns? In problem che dat da patratgar è quel dals umans che provan da fugir da guerras civilas (Siria) u da dictaturas snuaivlas (Eritrea). Ina part cuntanscha l'Europa paschailva nua ch'i na vegnan dentant betg adina beneventads. Partidas populisticas provan en plis pajais da gudagnar vuschs cun tementar la glied pervi dal «privel ester». Atras gruppas vesan il problem global e provan vias positivas vers schliaziuns a lunga vista per cumbatter l'inveteraziun da la populaziun. Ils 8 da fanadur han las gasettas romandas «Le Courier» (Genevra) e «La Liberté» (Friburg) deditgà in'entira pagina, sut la lingia grossa «In vitg che sustegna 'ses' requirents», a cas concrets en ils chantuns Soluturn e Giura. Il medem di ha «Le Courier» referì manidlamain davart ils requirents alloschads en ina baselgia da Losanna.

Sis requirents en in vitg

Il cas il pli original è quel da Rodersdorf/SO (var 1400 olmas), staziun finala da la viafier internaziunala a binaris stretgs che collia Basilea cun la valada dal Birsig. Rodersdorf cunfina cun l'Alsazia e fa part d'in intschess d'enclavas ed exclavas dal chantun Soluturn numnà Schwarzbubenland («pajais dals cuntrabandists»). Lezza vischnanca è limitrofa da quella da Metzleren/SO cun la claustra benedictina da Beinwil-Mariastein, lieu renunmà da pelegrinadi. Ha la tradiziunala ospitalità benedictina influenzà la glied da Rodersdorf? «Le Courier» e «La Liberté» scrivan: «Il vitg sa mobilischa per sustegnair ils requirents, als porscha curs supplementars da tudestg, ateliers creativs, matschs da ballape, ed als dat la pussaivladad da cuschinar spezialitads da lur pajais (...). Bliers umans da Rodersdorf han s'aranschads per ch'ils sis giuvens da l'Eritrea alloschads da la vischnanca possian entschaver a s'integrar avant che las autoritads fixeschian lur status. Oz repetan els cun scolast pensiunà Thomas Labhart il curs da tudestg instrui ier d'ina collega (...). L'entira magistraglia s'engascha per nagut (...). Ina famiglia ha schizunt decidì da finanzia in abunament da transport public da Rodersdorf a la citad da Soluturn.» Ils requirents n'astgan dentant betg bandunar il territori dal chantun. Cusseglia communal Ueli Hauser (pps) n'ha nagin problem, ni cun sia partida, ni cun ils sis requirents: «L'emprim laschavan els enavos

rument sin via. Ins als ha declerà tge ch'i duajan far, ed il problem è svanì. Hauser ha inoltrà in'istanza per astgar engaschar ils sis giuvens da fanadur tar la racolta da tschareschas (...). David Kummer, schef da l'Uffizi chantunal d'assicuranza sociala a Soluturn, commentescha: 'Tut quai che gida ad integrar po esser mo positiv.'» En il medem senn s'exprima Stefan Frey, pledader da l'Agid svizzer als fugitivs (Berna): «Ins po gia midar blier prendend contact cun fugitivs; quests bandan lura ch'ins s'interessa per els, quai gida a'ls integrar.»

Da Porrentruy/JU ad Aarberg/AG

Il medem numer da las duas gasettas rapporta da l'aziun da chantuns romands e cunzunt dal Giura per albergiar ils requirents. «L'Uniun giurassiana per beneventar migrants (Ajam, Delémont) ha retschavì 570 persunas avant in onn. Oz è bunamain 700 alloschadas en ses bajetgs; quai munta bunamain 25% dapli (...). Da zercladur 2015 ha l'Ajam retschavì 40 requirents dapli cunter mo 15 avant dus mais; ella prenda oz en locaziun 1700 abitaziuns en l'entir chantun. Quest ha incumbensà l'Ajam d'alloschar ils requirents e d'avair quità d'els. L'Ajam manegia ch'i na cuntentia umanamain betg d'alloschar fugitivs en implants da protecziun civila e ch'i custia plinavant fitg blier. Ella accepta quai dentant sco mesira d'urgenza (...). Entant ha'la decidì da prender en locaziun l'anteriur Hôtel du Jura a Porrentruy [6637 olmas il 2008] (...). Lez duai

dar tetg a var quaranta requirents (...) e forsa er ad insaquantas femnas cun uffants pitschens (...). L'emprim ha la suprastanza da l'Ajam giavischà da s'entupar cun represchents da las autoritads communalas (...). Il persunal da l'Ajam duai avair quità da di e da notg dals requirents alloschads a Porrentruy, e guitaders vegnan a survegliar l'edifizi da notg. L'Ajam ha confermà che residents problematicas duajan vegnir dischlocads immediat». Ils chantuns da Friburg, Neuchâtel e Vad, sco mesira d'urgenza, han avert refugis da protecziun civila. A Ringgenberg/BE (2709 olmas il 2008) ha l'Armada dal salit «mess a disposiziun sia anteriura chasa da vacanzas sco alloschament d'urgenza»; tenor la «Jungfrau Zeitung» (Interlaken/BE) dals 9 da fanadur infurmescha il cussegl communal da Ringgenberg en chaussa gievgia, ils 16 a las 20.15. Ad Aarburg/AG (6693 olmas il 2008) planisescha il chantun, d'accord cun sia dretgira administrativa, da dar albiert a novanta requirents en duas chasas da pliras famiglias; la vischnanca ha fatg recurs tar il tribunal federal.

Baselgia occupada a Losanna

Areguard la concessiun da l'asil fa la Svizra part dal spazi da Schengen. Ella è pia suttamessa al decret «Dublin III» nr. 604/2013 da l'Uniun europeica (UE). Cumpetent per conceder l'asil ad in requirent è l'emprim pajais europeic nua ch'el arriva. Els bliers requirents che s'annunzian en Svizra provegnan da l'Italia; la Svizra als ren-

viescha perquai il pli savens en Italia. La marina taliana sa dat gia tutta fadia per salvar dal naufragi quels fugitivs che provan da cuntanscher ils 7600 (!) km da rivas maritimas talianas sin bartgas savens malsegiras. «En Italia è sbartgads il 2014 passa 170 000 'boat people'» («Der Spiegel online» dals 20 d'avrigl 2015). Dentant na po'la betg adina retschaver requirents che sa chattan gia en tschertas situaziuns criticas. Quai ha chapì noss tribunal amministrativ federal: «Cun sia decisiun dals 31 da mars 2015 ha l'obligà la Svizra a giuditgar da cas en cas ils motifs che pudessan impedir in'expulsiun segund 'Dublin III' (...). Tals motifs famigliars u medicals pudessan pia incitar ad examinar dumondas d'asil tenor la procedura ordinaria» («Le Courier» dals 4 da fanadur 2015, p. 4). Quai ha stimulà la regenza vadaisa, l'emprim da fanadur, d'empermetter ch'ils requirents segund «Dublin III» dastgian inoltrar ina dumonda d'asil en il chantun Vad avant ils 15 da settember. «La regenza ha plinavant precisà sia collavuraziun cun il Servetsch social internaziunal [a Genevra] per eruir las condiziuns minimas d'admissiun en Italia.» Quai munta ina victoria parziala per ils sis requirents, quatter da l'Eritrea e dus da l'Etiopia, e per lur protecturs svizzers che spetgan dapi mars en la baselgia Saint-Laurent da Losanna (129 902 olmas il 2012). Per cumparegliar: Tenor Amnesty International ha la Svizra il 2014 concedì l'asil a 6199 requirents e l'admissiun provisorica a 7924.